

05/03/2003

Pemimpin BN anggap Musa pilihan paling sesuai

Munaarfah Abu Bakar; Mohd Azrone Sarabatin; Normah Bitong; Sitti Nor  
KUALA LUMPUR: Pelantikan Pengerusi Badan Perhubungan Umno Negeri Sabah, Datuk Musa Aman sebagai Ketua Menteri menggantikan Datuk Chong Kah Kiat diterima baik pemimpin kanan parti komponen Barisan Nasional (BN).

Naib Presiden Umno, Tan Sri Muhammad Muhd Taib menyifatkan pelantikan Musa sebagai keputusan tepat yang berupaya memudahkan penyelarasan kerja antara Kerajaan Persekutuan, Umno dan BN.

"Pelantikan itu baik untuk Sabah kerana beliau bukan saja berpengalaman luas dalam kerajaan, malah sebagai Pengerusi Badan Perhubungan Umno dan BN negeri, beliau berupaya mengemudi negeri itu dengan berkesan.

"Saya harap Umno Sabah lebih kukuh bagi memastikan BN mantap menghadapi pilihan raya Sabah menjelang Mac tahun depan," katanya.

Presiden Gerakan, Datuk Seri Dr Lim Keng Yaik, berkata pengumuman itu akan menstabilkan politik Sabah serta menamatkan spekulasi mengenai siapa bakal Ketua Menteri baru.

"Saya mengucapkan tahniah kepadanya dan berharap beliau meneruskan kerja dengan cemerlang dalam semangat perjuangan BN," katanya.

Presiden MIC, Datuk Seri S Samy Vellu yakin Musa dapat berfungsi secara proaktif bagi memesatkan pembangunan sedia ada, di samping berusaha gigih demi kesejahteraan rakyat negeri itu.

"Saya yakin pengalaman luas Musa dalam Umno serta organisasi BN sebenarnya satu kelebihan kepada parti menghadapi pilihan raya umum akan datang," katanya.

Presiden Parti Bersatu Sabah (PBS), Datuk Joseph Pairin Kitingan, berkata parti itu akan memberi kerjasama kepada peneraju pemerintahan kerajaan negeri yang baru itu.

"Saya mengucapkan tahniah kepada Musa dan yakin beliau mampu menjalankan tugas dengan bijaksana untuk kebaikan semua," katanya.

Ditanya mengenai kemungkinan berlaku rombakan dalam Kabinet negeri, Pairin berkata, parti itu bersedia menyumbang khidmat dan berharap PBS diambil kira (dalam senarai Kabinet).

Presiden Parti Bersatu Rakyat Sabah (PBRS), Tan Sri Joseph Kurup, berkata parti itu akan memberi sokongan padu kepada Musa dan yakin pelantikan itu mendapat sokongan rakyat Sabah.

"Pelantikan Musa memang tepat kerana beliau adalah pemimpin berkaliber dalam bidang pentadbiran dan ekonomi. PBRS berharap beliau dapat menjalankan tanggungjawab dengan berkesan," katanya.

Kurup juga berharap Musa boleh berkhidmat kepada semua kaum tanpa mengira agama dan ideologi politik.

Presiden Parti Maju Sabah, Datuk Yong Teck Lee, turut mengalu-alukan pelantikan itu dan menganggap ia dapat meredakan penantian rakyat yang

selama ini tertanya-tanya Ketua Menteri baru mereka.

Beliau berkata, partinya akan memberi kerjasama padu kepada Ketua Menteri baru, khususnya menghadapi pilihan raya akan datang.

Presiden Parti Progresif Penduduk, Senator Datuk M Kayveas berharap Ketua Menteri Sabah baru akan meneruskan semua projek pembangunan yang diusahakan ketua menteri sebelum ini.

"Saya juga yakin Musa dapat mengukuhkan perpaduan komponen BN bagi menguatkan kekuatan parti pada pilihan raya umum akan datang," katanya.

Ketua Penerangan Umno Sabah, Datuk Rahim Ismail, berkata sebagai pemimpin paling kanan dalam Umno Sabah, pelantikan Musa adalah pilihan yang kena pada masanya.

Beliau yakin pilihan Dr Mahathir Mohamad itu dapat diterima semua ahli Umno dan pemimpin parti komponen BN serta rakyat negeri itu.

Ketua Wanita Umno Sabah, Datuk Dayang Mahani Tun Ahmad Raffae, yakin Musa mampu berbakti kepada rakyat dan meneruskan pembangunan yang dinikmati sekarang.

"Pelantikan itu tepat pada masanya dan kami akan memberi sokongan tidak berbelah bagi kepadanya terutama mempersiapkan jentera parti menghadapi pilihan raya," katanya.

Ketua Puteri Umno Sabah, Rosnah Abd Rashid Shirlin pula memberi jaminan pergerakan itu akan memberi sokongan padu kepada Musa memimpin negeri Sabah dan rakyatnya.

Sementara itu, Pengerusi Perhubungan Parti Keadilan Nasional (Keadilan)

Sabah, Datin Saidatul Badru Said berharap Musa bekerja keras meningkatkan ekonomi Sabah yang kini pada kedudukan hampir muflis.

"Tahniah kepada Musa, tetapi jangan lupa perjuangan membela rakyat dan mencari kaedah terbaik untuk menjana ekonomi negeri yang kini di ambang muflis," katanya.